

HØYRINGSUTKAST pr 04.10.2019

## Skysreglement for grunnskulen i Volda kommune

Utarbeidd med heimel i Lov om grunnskolen og den vidaregåande opplæringa (opplæringslova) §§ 7-1, 7-3 og 13-4 og i samsvar med Møre og Romsdal fylkeskommune sitt skysreglement for grunnskulen.

### 1. Formål, verkeområde, rettsgrunnlag og ansvar

#### 1.1 Formål

Skysreglementet skal sikre tydelege retningslinjer og gjere det føreseieleg for elevar og føresette. Sentrale prinsipp i forvaltninga er at ho skal vere regelstyrt, føreseieleg og basert på likehandsaming.

#### 1.2 Verkeområde

Skysreglementet omfattar alle born busett i Volda kommune som har rett og plikt til grunnskuleopplæring etter opplæringslova § 2-1.

#### 1.3 Ansvar

Jfr opplæringslova § 13-4, er kommunen ansvarleg for skyss av grunnskuleelevar som har rett til skyss grunna særleg farleg eller vanskeleg skuleveg. Elles er Møre og Romsdal fylkeskommune ansvarleg for skuleskyssen.

Viss kommunen ynskjer ei betre tilpassing av skuleskyssen enn det rettane etter opplæringslova tilseier, vert kommunen sjølv ansvarleg for meirkostnadene med dette.

Rådmannen har delegert til kommunalsjef oppvekst å handsame søknader om skuleskyss grunna særleg farleg eller vanskeleg skuleveg.

#### 1.4 Rettsgrunnlaget

Opplæringslova § 7-1:

*Elevar i 2.-10. årstrinn som bur meir enn fire kilometer frå skolen har rett til gratis skyss. For elevar i 1. årstrinn er skyssgrensa to kilometer. Elevar som har særleg farleg eller vanskeleg skuleveg har rett til gratis skyss utan omsyn til veglengda.*

Ansvarsfordelinga mellom fylkeskommunen og kommunen kjem fram i opplæringslova § 13-4:

*Kommunen er ansvarleg for skyss av grunnskuleelevar og vaksne som har rett til skyss på grunn av særleg farleg eller vanskeleg skuleveg. Kommunen skal oppfylle retten til reisefølgje og tilsyn for grunnskuleelevar og vaksne. Elles er fylkeskommunen ansvarleg for skyss, reisefølgje og tilsyn etter reglane i kapittel 7. Kommunane betaler refusjon etter persontakst for grunnskuleelevar og vaksne som blir skyssa av fylkeskommunen.*

Utdanningsdirektoratet har gitt rettleiing i høve til kva moment som kan vere med i vurderinga av særleg farlege eller vanskelege strekningar i rundskriv Udir-3-2009, punkt 12:

*Dette kan mellom anna vere trafikkettleik, vegdekke, breidde, vegskulder, fotgjengarovergangar, fartsdumpar, lys, generell sikt, fartsgrense og ulykkesstatistikk. Ein må vere merksam på at trafikktilhøva kan endrast gjennom årstidene, til dømes når det gjeld lys/sikt, føre og brøyting. Det må*

*deretter gjerast ei vurdering av om den einskilde elev har føresetnader for å ta seg forsvarleg fram i det aktuelle trafikkbiletet. Ved den individuelle vurderinga må det mellom anna takast omsyn til alder, utvikling, syn og hørsel...»*

Utdanningsdirektoratet framhevar at det ut frå ordlyden i oppl.l. § 7-1 må vere tale om ein "særleg risiko" for å få rett til gratis skuleskyss. Ved tolkinga har direktoratet lagt til grunn at elevar som ferdast i trafikken alltid vil vere utsette for ein viss fare. Dette er likevel ikkje i seg sjølv nok til å få gratis skuleskyss:

*«ettersom det må vere tale om ein 'særleg risiko'. Dette inneber at faren ved å ferdast på denne vegen må vere utanom det vanlege for at vegen skal kunne karakteriserast som "særleg farleg eller vanskeleg" skuleveg for den einskilde elev.»*

## 2. Eleven sin heim og skule

### 2.1 Eleven sin heim

Bustad er i utgangspunktet den adressa eleven står oppført med i folkeregisteret. Fosterheim, mellombels bustad og avlastningsheim vert og rekna som bustad.

Ved delt bustad er bustad begge foreldrebustadene. Ein elev har delt bustad når dei bur tilnærma like mykje hjå begge foreldra, og eleven har då rett til skyss frå begge heimane. Vurdering knytt til forsvarleg reisetid vil kunne avgrense denne retten.

### 2.2 Eleven sin skule / skulefritidsordning

Kommunen avgjer kva skule eleven høyrer til. Elevar soknar i utgangspunktet til den skulen som ligg nærast heimen. Det er likevel opning for å søke om å gå på annan skule enn nærskulen.

I tilfelle der søknader om å gå på annan skule enn nærskulen vert innvilga, er hovudregelen at dei føresette må ta ansvar for organiseringa av og kostnadene med skuleskyss. Viss søknaden er grunngjeve med pedagogiske eller sosiale tilhøve som er naudsynt for å sikre retten til opplæring, jf opplæringslova §§ 2-1 og 9a-2, kan gratis skuleskyss likevel verte innvilga.

Elevar har ikkje rett på skyss til og frå skulefritidsordning. Unnataket er elevar som grunna funksjonshemming eller mellombels skade/sjukdom har behov for skyss. Skade/sjukdom må dokumenterast med ei sakkunnig erklæring.

Retten omfattar ikkje skyss i skuleferiar.

## 3. Vedtak og klagerett

Vedtak om skuleskyss er eit enkeltvedtak som det er klagerett på. Frist for å klage er tre veker etter at vedtaket er motteke. Fylkesmannen i Møre og Romsdal er klageinstans, men ein klage skal sendast til samferdsleavdelinga i Møre og Romsdal fylkeskommune. Viss fylkeskommunen opprettheld vedtaket, vert den sendt vidare til Fylkesmannen.

Klage på vedtak gjort av kommunen, skal sendast til kommunalsjef oppvekst.

## 4. Særskilde skyssreglar for grunnskuleelevar i Volda kommune

### *Hornindal skule*

- Elevar i 1.- 4. klasse som bur langs fylkesveg 726 frå Steinledet (ikkje med) til fylkesveg 60, og langs vegen til Ytre Haugen
- Elevar i 1.- 10. klasse som har fylkesveg 60 frå Storebrua til Fannemel som skuleveg

- Elevar i 1.-7. klasse som nyttar fylkesveg 60 frå bru over Vikaelva til Skavika (Ytre Svor) som skuleveg
- Elevar som går 2.-7. klasse som har strekninga Grothaug – skulen som skuleveg.

Vinterskyss 15. oktober - 15. mars

- Elevar i 4.-7. klasse som bur langs fylkesveg 726 frå Steinledet (ikkje med) til fylkesveg 60, og lang vegen til Ytre Haugen
- Elevar i 8.-10. klasse som nyttar fylkesveg 60 frå bru over Vikaelva til Skavika (Ytre Svor) som skuleveg.

#### *Austefjord skule*

- Elevar i 1.-7. klasse på strekninga Aurstad – Austefjord skule
- Elevar i 1.-4. klasse på strekninga Skinnvik – Austefjord skule

#### *Bratteberg skule*

- Elevar i 1.-4. klasse på strekninga Fremmerlid – Bratteberg skule (Hoggabakkane)

#### *Andre strekningar*

- Dersom det kjem fram skyssbehov grunna særleg farleg eller vanskeleg skuleveg utover dei som er lista opp over, vert desse vurderte som enkeltsaker etter søknad.

**Oppvekst**  
**Okt 2019**